

Penerima BKM terima tambahan RM100, RM50

BH - 23/6/2022
m/d: 2

Insentif tunai beri manfaat 8.6 juta penerima B40 babit peruntukan RM630 juta

Oleh Muhammad Yusri Muzamir, Ahmad Suhael Adnan dan Fahmy A Rosli
bhnews@bh.com.my

Kuala Lumpur: Kerajaan semalam mengumumkan bantuan tunai tambahan sebanyak RM100 untuk isi rumah dan RM50 bagi golongan bujang bagi meringankan beban kos sara hidup dan kenaikan harga barang makanan sejak kebelakangan ini.

Insentif tunai langsung itu dijangka memberi manfaat kepada 8.6 juta penerima Bantuan Keluarga Malaysia (BKM) dalam kumpulan B40 membabitkan peruntukan tambahan berjumlah RM630 juta.

Daripada 8.6 juta penerima itu, 4 juta membabitkan isi rumah, 1.2 juta warga emas dan 3.4 juta

individu bujang.


Perdana Menteri, Datuk Seri Ismail Sabri Yaakob yang membuat pengumuman itu berkata, bayaran tunai tambahan itu akan meringankan beban kewangan golongan B40 terutama ketika menyambut Aidiladha tidak lama lagi.

“Mengambil kira cabaran kos sara hidup dan kenaikan harga barang makanan kebelakangan ini, kerajaan mengambil keputusan untuk menyediakan bantuan tunai tambahan kepada golongan B40, iaitu sebanyak RM100 untuk golongan isi rumah dan RM50 untuk golongan bujang.

“Ya akan diagihkan kepada penerima BKM. BKM adalah inisiatif bantuan tunai langsung yang diumumkan dalam Belanjawan 2022 bagi memanfaatkan golongan B40. Setakat ini, 8.6 juta penerima BKM telah diluluskan dengan isi rumah bakal menerima sehingga RM2,500 pada tahun 2022.

“Bantuan ini adalah yang tertinggi setakat ini yang pernah diberikan oleh mana-mana kerajaan,” katanya dalam pengumuman yang turut disiarkan secara langsung menerusi RTM.

— Mengikut perancangan, baya-



Ismail Sabri pada sidang media khas di Bangunan Perdana Putra, semalam. Yang turut hadir, Tengku Zafrul dan Alexander. (Foto BERNAMA)

ran Fasa 2 BKM membabitkan peruntukan sebanyak RM1.11 bilion dengan setiap penerima menerima sehingga RM400 mengikut kategori kelayakan BKM masing-masing.

Berikutan pemberian tunai tambahan itu, setiap penerima Fasa 2 BKM akan menerima sehingga RM500 mengikut kategori kelayakan masing-masing.

“Bayaran Fasa 2 BKM dan pembayaran tunai tambahan akan dibuat secara berperingkat mulai 27 Jun ini, membabitkan peruntukan keseluruhan sebanyak RM1.74 bilion.

“Kerajaan sentiasa cakna dengan keperluan rakyat terutamanya membabitkan kenaikan harga barangan keperluan dan akan terus komited dalam memastikan kesejahteraan Keluarga Malaysia terutama kumpulan sasar,” katanya.

Pada 1 Jun lalu, Ismail Sabri mengumumkan bahawa bantuan tunai akan diberikan kepada rakyat Malaysia yang terkesan akibat cabaran kos sara hidup se-

lepas kerajaan memutuskan tidak lagi memberikan subsidi harga ayam dan telur.

Ia susulan keputusan kerajaan untuk menghentikan bayaran subsidi kepada penternak ayam bermula 1 Julai ini yang berjumlah RM700 juta.

Perdana Menteri dilaporkan berkata: “Mulai 1 Julai nanti kita tidak lagi akan memberikan subsidi kepada penternak ayam, tetapi kita akan berikan terus kepada rakyat yang memerlukan”.

Semakan status pembayaran Fasa 2 BKM boleh dibuat bermula Isnin ini, melalui pautan <https://bkm.hasil.gov.my>.

Mengulas lanjut, Ismail Sabri berkata, kerajaan memutuskan untuk menghentikan subsidi RM700 juta subsidi kepada penternak untuk menstabilkan harga ayam dan telur.

Katanya, ketetapan itu diambil kerana apa yang dilakukan kerajaan tidak mencapai hasrat seperti dikehendaki kerana ada pihak yang mengambil kesempatan dengan terus menaikkan har-

ga. Situasi itu sekali gus memberi kesan kepada kenaikan harga barang makanan lain.

“Oleh kerana itu pada 1 Julai nanti, harga ayam tidak lagi disubsidi oleh kerajaan kerana walaupun kerajaan mengeluarkan RM700 juta untuk subsidi ayam supaya tiada kenaikan harga, tetapi kita lihat harga (siling) tidak juga kekal seperti ditetapkan kerajaan iaitu sebanyak RM8.90 sekilogram.

“Ada rungutan di banyak tempat, dalam media, berita, televisyen dan sebagainya apabila ada (harga ayam) sampai RM13 (sekilogram).

“Dengan belanja RM700 juta untuk subsidi, harapan kerajaan tidak tercapai kerana ada pihak yang mengambil kesempatan untuk menaikkan harga,” katanya.

Sidang media khas semalam turut disertai Menteri Kewangan, Datuk Seri Tengku Zafrul Tengku Abdul Aziz dan Menteri Perdagangan Dalam Negeri dan Hal Ehwal Pengguna, Datuk Seri Alexander Nanti Linggi.